

nichts gewesen dan ein grobes Ding/ vñ in disem Ding/ seind  
 verborgē gewesen die 4. Element: Ein Ding/ dz kein Arbt noch  
 Gestalt hat/ sonder grob/ reuchig/ schleimig/ lufftig/ möserig/  
 schwefelig/ hitzig/ &c. Vñ in disen dingē ist kein Maß nützer nit:  
 sonder alle Welt ist nichts dann ein vnartig/ verachtet/ lächerig  
 Ding / wiewol alle ding sind in disem vnartigē Ding verborgē/  
 vñ alle Creaturē sind durch diß Ding erschaffen vñ gemacht/ vñ  
 ohn diß Ding kan nichts gemacht werden. Nun merck was das  
 für ein Erdtrich ist. Es ist Almah Hebreüm, sancta & secreta:  
 Ein vnbekante Jungfraw/ ein verborgene Jungfraw: Welche  
 den Anblick der Männer nicht hat mögen leiden/ sonder sie hat  
 sich gebraucht vnder den Völckern allenthalben: Allß/ auff den  
 Gassen hat sie kein Mann nie nit nackendt oder ploß gesehen/  
 Es hat sie auch keiner nie berührt. Von diser Jungfrawē sagt d  
 Prophet also: Sihe/ wir haben einē heimlichen gebornē Sohn/  
 welcher ist verwandelt vber anderē: Sihe/ die Jungfraw hat  
 geboren/ ein solche Jungfraw/ welche wirt genant Apdorisa,  
 das ist/ Heimlich/ die andere nit leiden mag: Nun sag mir/ was  
 diß für ein Jungfraw ist? Das ist ein Ding/ das rein/ keusch/  
 roth/ lustig/ irdisch/ lauter vñ gerecht/ vñ mit anderē Dingē nit  
 wil zuschaffen haben: Sonder ist nichts dann zuersten ist ge-  
 wesen/ vñnd begeret auch keiner anderen außwendigen Natur/  
 vñnd durch sein eigen Natur will es geboren/ gemacht vñnd er-  
 schaffen werden/ Erstlich der Sohn/ darnach das Mägdlein/  
 das sich zu dem Sohn vergleiche/ vñ von seiner Natur ist / als  
 Hermes spricht in seinen Sprüchen:

Meins Sohns Mann Ich doch wahr/  
 Vnd kam mit ihm selb ander dar/  
 Vnd gebar auff einem fruchtbaren Anger/  
 Da Ich sein wurde schwanger:  
 Ich ward Mutter/ vnd bleib doch Magdt/  
 Alls Gott geschickt hat wissentlicher Art.  
 Die Mutter die mich hat gebärt/  
 Durch mich wird sie geboren auff Erdt.